



Hemel en aarde ontmoet mekaar

Om *Blitsposte* ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan taal@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Die een of ander engel het verklaar, Hemel en aarde ontmoet mekaar, die woorde van die lied *Berge en dale*, gesing deur Laurika Rauch, laat my dink aan die viering van Hemelvaart. God wat in en deur Jesus Christus mense ontmoet, aan mense 'n ewige woning in God se teenwoordigheid skep, gee hoop vir die lewe.

In Handeling 1 word die ervaring van Jesus se dissipels tydens Jesus se Hemelvaart vir ons uitgebeeld. Dit wat Jesus se dissipels ervaar het met sy hemelvaart is waarskynlik nie dieselfde ervaring wat gelowiges ervaar wanneer Hemelvaart gevier word nie. Ons vier Jesus se hemelvaart vanuit 'n ander perspektief as wat hulle dit beleef het.

Dit wat vir hulle belowe is, is vir ons 'n werklikheid. God se Gees in ons, by ons, om ons. Die dissipels het dit nog nie ervaar nie, hul belewenis is anders. Hul agterna kyk, bly staan en staar na die plek waar Jesus net kort gelede nog was. Dit vertel van 'n verslaentheid, verwarring, die spreekwoordelike mat wat onder hul voete uitgeruk is, hartseer, 'n nie weet hoe om verder te leef of wat om volgende te doen nie.

Al vier ons Hemelvaart met 'n ander perspektief is hierdie ervaring van die dissipels – die verslaentheid, eensaamheid, die nie weet hoe om verder te leef waar hulle agter moet bly op aarde nie – ook 'n gevoel wat ons ken.

Ook ons staan soms verslae as gevolg van wat met ons hier op aarde gebeur. Ons almal wat al moes afskeid neem van 'n geliefde wat sterf, ken hierdie gevoel. Ons bly agter, moet alleen verder leef en verder werk. Ons voel alleen in ons hartseer en ons verlange.

Die woorde dat ons eendag weer saam met ons geliefdes in die hemel sal wees, dat dinge beter sal gaan en beter sal wees wanneer Jesus weer kom en ons verlos van hierdie wêreld troos ons. Maar soos dit nie vir die dissipels genoeg was om verder te leef nie, is dit ook nie vir ons genoeg nie.

Daarom is die troos wat aan die dissipels en ons gegee word binne hierdie gevoel van verlatenheid, aan jouself oorgelaat wees, nie net die belofte dat Jesus weer gaan kom nie, maar die belofte aan die dissipels, die realiteit waarin ons leef, dat Jesus ons nie soos weeskinders agtergelaat het nie. Jesus stuur vir ons 'n ander Voorspraak, 'n Trooster, wat ewig en altyd by ons sal wees.

Ons almal ervaar die een of ander tyd die gevoel van eensaamheid en hartseer om agtergelaat te word. Ons almal staan soms verslae en ontnugter as gevolg van wat ons op hierdie aarde ervaar. Die troos wat Jesus aan ons wil bring, is dat ons binne ons eensaamheid, hartseer, teleurstelling en ontnugtering nie verlaat of versaak behoort te voel nie, so asof Jesus nie meer omgee nie. Jesus Christus leef, is die een wat oor ons lewe waghou en die heelal regeer. Deur Jesus Christus ontmoet hemel en aarde (God en mens) mekaar.

Dr Annelie Botha
(Universiteit van Pretoria/Kempton)

Lief en leed



Lourenda Steyn

- Gelukwense gaan aan **mev Christa Steyn**, weduwee van ds Wimpie Steyn, se kleindogter. **Lourenda Steyn** het Springbokkleure verwerf in gholf.
- Die Sinodale Dienssentrum het met leedwese verneem van die afsterwe van **Tommy Malan** van die Sinodale Dienssentrum se ma, **Anthea Malan**. Anthea was ook 'n vorige werknemer van die Sinodale Dienssentrum. Ons bid vir Tommy en Yolanda die Heer se seën en vertroosting toe in hierdie hartseer tyd.
- **Die volgende predikante verjaar tot 6 Junie 2025, en word hartlik geluk gewens:**
 - Woensdag 28 Mei: Ds PA (Paul) van Jaarsveld (34) (Wapadrant)
 - Donderdag 29 Mei: Ds P (Paula) Eksteen (49) (nie-diensdoende predikant)
 - Woensdag 4 Junie: Di TF (Thomas) Joubert 67 (emeritus), CAA (Tiaan) Loedolff (39) (Wolmaransstad)
 - Donderdag 5 Junie: Dr JGM (Hans) Dreyer (80) (emeritus), ds GF (Frikkie) van Wyk (60) (Montana-Oos)
 - Vrydag 6 Junie: Prof APB (Andries) Breytenbach (81) (emeritus/Vanderkloof)

Gemeentes en bediening

- **Gemeente Pretoria-Wes se nuwe tuiste:** Op 25 Mei 2025 het Gemeente Pretoria-Wes afskeid geneem van die kerkgebou. Dit was die einde van 'n hoofstuk, maar ook die begin van 'n nuwe hoofstuk saam met Gemeente Elandspoort. Gemeente Pretoria-Wes se nuwe adres is: Knightstraat 113, Danville, Pretoria, 0183. U kan ons ook telefonies bereik deur Mochzell Potgieter die administratiewe beampte te skakel by 073 198 5105 of ds Marissa Kidson by 084 324 1568.
- Die Kommissie van die AKV verleen emeritaat op 31 Oktober 2025 aan **ds KF (Kathleen) Smith**.
- Die Kommissie van die AKV verleen vervroegde emeritaat op 31 Desember 2025 aan **dr EB (Ernest) Marran**.
- **Kroon van Wonders – 'n Pinksteroratorium** vind op **29 Mei en 1 Junie by NG Universiteitsoord** plaas. Die teks vir *Kroon van Wonders* is saamgestel uit die Evangelies se opstandings- en hemelvaartverhale. Die uitvoering word aangebied deur die bekroonde Vox Chamber Choir van Pretoria, onder leiding van Franco Prinsloo, saam met 'n indrukwekkende ensemble van 26 strykers, vier koperblasers, 'n enkele fagot, orrel en perkussie. Kyk gerus [hier](#) na 'n onderhoud met Franco Prinsloo oor die oratorium. Meer inligting en besprekings is [hier](#) beskikbaar.
- U word hartlik uitgenooi na **die emeritaatsgeleentheid van ds Willem Breytenbach** (Hazyviev/Sabie/Witrivier) op Sondag **8 Junie** om 10:00 by Gemeente Witrivier. Daar is 'n ete na die diens. Kontak asseblief vir Henriette (079 492 4317) voor 30 Mei indien u dit wil bywoon.
- **Gemeente Centurion-Oos se 60ste bestaansjaar** (30 Junie) word met groot dankbaarheid en vreugde op **7 en 8 Junie** gevier.
 - **Saterdag 7 Junie**
 - 08:00: **Pretstap** (Ons parkeer by die kerk en word per bus vervoer na die roete en terug).
 - 08:00-13:00: **Feesmark** by die kerk. Heerlike eetgoed, uitstallings van verskeie produkte, geskenke en vermaak vir die jongspan.
 - 14:00-19:00: **Spitbraaikuier** vir die hele gesin. Kontak gerus vir Maryna by die kantoor om kaartjies te koop (012 664 2044 / 082 782 7102).



Ds Kathleen Smith



Dr Ernest Marran

○ **Sondag 8 Junie**

09:00: **Feesdiens** en nagmaal wat afgesluit word met koffie/tee en 'n eetdingetjie na die diens. Bevestig asseblief per e-pos (kantoor@nhkcenturionos.co.za) indien u graag die geleentheid op Sondag 8 Junie wil bywoon.

Vergaderings

- Donderdag 5 Junie: Kommissie van die AKV
- Vrydag 6 Junie: Kommissie van die AKV

Ringsvergadering

- Op 10 Mei het die **Ring van die Wes-Kaap** in die eerste ordentlike en gietende reën van die seisoen bymekaar gekom by Gemeente Strand. Ons het na die inspirerende *shack builder* **Quinton Adams** geluister, saam geëet, gekuier en vergader.



'n Gedig

Sou ek?

Wat as 'n engel die berig sou bring
van 'n Kripkind onder 'n wildesering;
as straatkinders verskrik en verstom,
van 'n engel in 'n soeklig sou vertel;
geleerdes glo wat agter 'n ster aan kom?

En as die kruis op Klapperkop was,
sou ek ook op Hom wou spoeg en skel,
saam met die skare "Hang Hom" skree
en vir Jesus asyn in plaas van water gee?

Sou ek glo die Heer het opgestaan,
as ek sien Hy ry hier op die grond
tussen ons in minibussies rond?

Sê nou Hy het van die Vaal af opgevaar,
sou ek dan kon glo die ou Berig is waar?

Hans du Plessis

www.litnet.co.za/elders-gesien-n-gedig-vir-hemelvaartdag/

Kerklke en ander publikasies

- Die gewilde **Afrikaanse Bybel vir Almal** is nou weer beskikbaar. Dit is ideaal vir gebruik tydens huisgodsdiens, vir die jeug en as geskenk tydens die Afrikaans 100 feesjaar. Stuur 'n epos na sales@biblesociety.co.za vir meer inligting.

Fondsinsamelings

- Dis weer basaartyd!** Laat weet asseblief (taal@nhk.co.za) wanneer ons by julle heerlike pannekoek en basaarpoeding kan kom eet:
 - 30 Mei: Middelburg-Noord
 - 30 en 31 Mei: Standerton
 - 31 Mei: Culembeeck
Delmas
Groeneweide
Hartbeesfontein
Lichtenburg
Malelane
Marble Hall
Primrose-Oos
Schoemansdal
 - 6 Junie: Heidelberg
 - 6 en 7 Junie: Ons Tuis Machteld Postmus
 - 7 Junie: Parys
Vanderkloof
 - 27 Junie: Odendaalsrus
- Gemeente Delmas** se jaarlikse **Voetspoorfees** vind op **31 Mei** vanaf 08:00 plaas. Hierdie is 'n plattelandse kerkbasaar slegs 'n hanetreetjie van die stad af. Kom ervaar plattelandse gasvryheid met lekker basaar kosse, trompoppies, toutrek en Nico Booijse wat musiek gaan maak. Wors en maaltvleis word te koop aangebied. Ons gaan ook poog om 'n Delmas-rekord op te stel deur 500 persone se hare met 'n tydelike haarkleursel te kleur. Kom deel in die dag se pret!
- Gemeente Lichtenburg se Oesfees** vind op **31 Mei 2025** plaas. Die feestelikheid begin reeds vroeg die oggend met die amptelike opening om 08:30. Talle eetgoed, soos pannekoek, vetkoek, sosaties, worsbroodjies, donuts, lekkergoed en vele meer is beskikbaar. Wors, maaltvleis en tuisgebakte koekies word te koop aangebied. Daar is tonne vermaak vir oud en jonk tydens die Oesfees se skyfskietkompetisie, boeresport en 'n meganiese bul wat gery kan word. Die vermaak word self meer met Ivan Roux wat as gaskunstenaar optree. Daar is **hope pryse te wen** met ons **gelukkige trekking**. Kaartjies kan [hier](#) aanlyn gekoop word.
- Kom kuier saam! **Gemeente Vanderkloof** nooi jou hartlik uit na hul basaar op **Saterdag 7 Junie 2025 in Orania!**
Tyd: 09:00 tot 13:00
Plek: Voor die Orania Beweging se kantoor – in die tuin, natuurlik!
Dis 'n fees van smake en lekkerte! Kom koop by die vleistafel, kry jou biltong, pannekoek, sosaties, melkkos, boereworsrolle, kerrie-en-rys, en geniet soetgoed soos basaarpoeding in die teetuin. Bring die hele gesin en kom geniet 'n heerlike oggend saam met ons.
Basaarpret wag op jou!
- Gemeente Hartebeestpoort** (Brits) bied weer dié jaar hul 3de **Bosveld Mtb** op **2 Augustus 2025** aan as 'n fondsinsameling vir die gemeente. Daar is 'n keuse van vyf afstande, naamlik 4 km & 8 km *kiddies ride*, 36 km, 91 km en 156 km.
Plek: Brits Vliegveld
Tyd: Begin om 07:00
Aanlyn inkrywings kan gedoen word. Onthou as jy voor 31 Mei inskryf is die inskrywings





R100 goedkoper. Dié jaar het ons nog meer waterpunte en Bakkies Botha is ons gas vir die dag. Hy gaan self die 91 km doen.

Vir **navrae** kontak: Ds Corlien van der Merwe (083 654 8154), Marcel by Hartebeestpoort kerkkantoor (012 252 4315), Mechiel Ras (072 605 1393) of Mias van der Merwe (083 320 2466). Klik [hier](#) vir meer inligting en inskrywings. Gaan kyk gerus wat sê die vorige deelnemers onder *Testimony* (sic) op die webwerf.

- Die **Pastorie Gastekamers** in Polokwane bied gerieflike **oornagfasiliteite** op pad na die Krugerwildtuin of ander bestemmings in Limpopo. Elke kamer het 'n privaatingang, binnehof en selfsorgfasiliteite. Kontak ds Henk of Trudie Joubert (082 561 3799) vir meer inligting. Loer gerus [hier](#) na ons Facebook-blad.
- **Oornagfasiliteite: Seniordal.** Seniordal beskik oor oornagfasiliteite vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parking en 24-uur-sekureit. **Vir navrae oor tariewe en vir besprekings**, kontak Salomie Stolz gedurende kantoorure 08:00 tot 12:00 by 012 329 4318, of na ure by 083 308 0520.

Werksgeleenthede

NHK WAPADRANT / DIE KERK

NHK Wapadrant, geleë in Grasfontein (Pretoria), het 'n pos vir 'n dinamiese en verantwoordelike Operasionele Beampte.

POS: OPERASIONELE BEAMPT

KERNVERANTWOORDELIKHEDE SLUIT IN:

- Voorbereiding van eredienste en spesiale geleenthede
- Lidmaat- en finansiële administrasie, logistiek en sekretariële ondersteuning
- Instandhouding van fasiliteite en terrein

ONS IDEALE KANDIDAAT HET:

- Sterk administratiewe, organisatoriese en rekenaervaardighede
- Tegniese kennis van klank, video en digitale platforms
- Goeie menseverhoudinge en 'n diensbare ingesteldheid
- 'n Passie vir diens in 'n gemeentelike konteks

STUUR JOU CV EN MOTIVERINGSBRIEF AAN: diane@diekerk.com

SLUITINGSdatum 31 MEI

SP Engelbrecht-museum



- **Op soek na Transvaalse ougoed!** Elize Labuschagne, wat haar doktorsale proefskrif oor ou-Transvaalse boerehuise geskryf het, is besig aan 'n boek oor ou-Transvaalse meubels en stel veral belang in die meubels uit die Marico-area. Wie het nog 'n riempiesbank, 'n stoel, 'n wakis, tafel of 'n rakkie wat deur oupa in die tyd voor en kort na die Anglo-Boereoorlog gemaak is? Of selfs meubels wat tot laat in die 20ste eeu nog op die tradisionele manier gemaak is? Wie kan vir haar 'n storie vertel oor die meubelmakers van daardie tyd, of nog beter: 'n foto wys van die kunstige manne in ons omgewing wat meubels gemaak het? Tipies sou die meubels in tambotie, boekenhout of ander hardhout gewees het. Sy kom binnekort in Marico kuier en sal baie graag van die meubels wil afneem en die stories hoor. Kontak asseblief vir Elize by elizelab@mweb.co.za, of WhatsApp by 082 780 8021 as jy iets het om te vertel of om te wys. Neem somer 'n selfoonfoto van wat jy het, en stuur dit saam aan. Hier is twee foto's van die tipe meubels waarna sy soek.

Toerusting

- Die **Werkgemeenskap Historiese Teologie (SA)** se konferensie vind op **12 tot 13 Augustus** by Gemeente Pretoria-Oos plaas. Hierdie jaar word Nicea 1700 gevier. Dit is belangrik dat kerke en akademici hierdie belangrike gebeure herdenk. Daarom word die bogenoemde konferensie beplan met die tema **Skrif-Belydenis-Liturgie – Nadenke oor die Belydenis van Nicea**.

Die Werkgemeenskap Historiese Teologie (SA) in samewerking met die Departement Sistematiese en Historiese Teologie van die Universiteit van Pretoria nooi u uit om 'n voorstel in te dien vir 'n **akademiese bydrae** tydens die konferensie. Sprekers sluit in akademici van verskillende toonaangewende universiteite.

Tydlyn

- 31 Mei 2025: Opsomming word ingedien
- 12 Julie 2025: Finale program word uitgestuur
- Konferensie: 12 tot 13 Augustus 2025.

Meer inligting oor die konferensie sal nader aan die tyd in *Blitspos* gepubliseer word. Vir enige verdere navrae kontak gerus die volgende persone: prof WA Dreyer (wimdreyer@nhk.co.za) of dr Antionette Janse van Rensburg (antoejvr@gmail.com).

Barmhartigheid

- **NHSV-uitbetalings – Mei 2025:** Alle NHSV-takke en vrouelidmate word daaraan herinner dat die barmhartigheidsuitbetalings in Mei grootliks geoormerk word vir die ondersteuning aan bejaardes in nood. Die behoeftes vir barmhartigheid neem steeds toe en daarom is u bydraes en hulp van onskatbare waarde. Die NHSV-Hoofbestuur maak opnuut staat op elke gemeente en NHSV-tak se oop hand én hart wanneer dit kom by hierdie belangrike saak.

Bejaardesorguitbetalings vind jaarliks plaas om tekorte by die OTMT Ons Tuis-tehuise aan te vul ten opsigte van behoeftige inwoners, instandhouding en bedryfsuitgawes. Bejaardesorgfondse word ook aangewend vir spesiale gevalle buite die Ons Tuis-groep om bejaardes landswyd te ondersteun met spesiale behoeftes en versorging.

Die NHSV-uitbetalings vir Mei per gemeente/NHSV-tak is as volg:

- Bejaardesorg: R1.00 per belydende lidmaat
- Inrigtingsfonds: R1.00 per belydende lidmaat
- Administrasiefonds: R350.00 per gemeente
- Borgfonds OTMT: R300.00

Die Administrasiefonds word gebruik om die toekennings van studielenings aan te vul, uitgawes rondom die NHSV-Nasionale Kongres, streekbyeenkomste en NHSV-Hoofbestuurvergaderings te befonds asook administratiewe uitgawes van die NHSV-kantoor onder andere versending van pakkies na NHSV-takke en gemeentes, aandenkings en drukwerk vir streekbyeenkomste, ensovoorts.

Betaalstaat en inligting

Die betaalstaat is beskikbaar op die NHSV-webwerf: www.nhsv.org.za. Alle betalings moet die NHSV-Hoofbestuur verkieslik teen 31 Mei bereik. Betalings moet vergesel wees van 'n NHSV-betalstaat en kan oorbetal word na die volgende bankrekening:

Naam van rekeninghouer: NHSV Hoofbestuur

Bank: ABSA

Rekeningnommer: 405 145 4181

Takkode: 632005

Verwysing: Gemeente/NHSV-tak se naam

Stuur asseblief onmiddellik na die betaling elektronies of per bankdeposito gedoen is, beide die NHSV-betalstaat en bewys van betaling per e-pos aan die NHSV-kantoor by: finansies@nhsv.org.za. Kontak gerus die NHSV-kantoor 012 325 0117 of admin@nhsv.org.za vir meer inligting en hulp. Ons wil u by voorbaat bedank vir u liefdeswerk en barmhartigheid waar dit kom by die instansies wat deel vorm van die NHSV-Hoofbestuur se prioriteite.

- **Louis Trichardt-behuisingskompleks vir bejaardes** in Danville, Pretoria, bied kamergeriewe met twee etes per dag teen R3 850 per maand. Vir meer inligting, kontak mev Yvonne Willemse of matrone Jenny Wesson by 012 386 5310.
 - **Ons Tuis (Andries Marié Oosthuizen) in Parys** het plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
 - **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:
 - Eenslaapkamer: R515 000
 - 1½-slaapkamer: R520 000
 - Tweeslaapkamer: R560 000
- Kontak Salomie Stolz by 012 329 4313 (08:00-12:00) of 083 308 0520 (na-ure) vir meer inligting.
- **Herfsakker Selfsorg-aftreeoord in Groblersdal:** Behuising beskikbaar vir persone ouer as 60. Geen versorging beskikbaar nie, persone moet selfversorgend wees. Geen etes word voorsien nie. Eie tuin. Tariewe is per vierkante meter en verskil van huis tot huis. 'n Deposito van twee maande huur is betaalbaar. Vir meer besonderhede, skakel Frik Rossouw by 082 830 6591.
 - **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanseerde maaltye per dag, en aktiwiteite vir elkeen. Daar is fasiliteite vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / manager@belfastrusoord.co.za vir meer inligting en tariewe.
 - **Athalia Uitreik in Bloemfontein** bied verblyf vir en versorging van bejaardes en persone met gestremdhede. Daar is enkel- en deulkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / navrae@athalia.co.za / www.athalia.co.za.

Betaalde advertensies in hierdie nuusbrieff

Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrieff geplaas word. (*Tekskennisgewings van gemeentes is gratis.*) Indien 'n jpg-weergawe van die advertensie voorsien word, **moet dit 15,5 cm breed x 6,5 cm hoog wees, resolusie 1878 x 815 pixels, 150-300 dpi.**

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan **mej Sanet du Plessis**, per e-pos na taal@nhk.co.za. GEEN advertensie sal geplaas word sonder die betalingsbewys nie.

Die **teks en bewys van betaling** moet mej Du Plessis bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaa. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasinge.

Die koste is R250 per plasing (BTW ingesluit). Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, **verwysing: u naam + Blitzpos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.**

Gebed vir die week

Here God,
U woon daar bo en ons hier onder.
Dis nogal 'n verskil.
Hier onder lyk dit dikwels asof U nie bestaan nie.
Maar die dag van u Hemelvaart herinner ons daaraan
dat daar 'n verband tussen hemel en aarde is.
Hierdie verband is deur Jesus Christus geskep.
Hy het afgekom na die aarde en Hy het weer teruggekeer na bo.
Hy is nou by U en danksy Hom kan ons na U toe kom.

God, gee dat daardie wete ons harte warm sal maak
en seën ons kollegas en al die mense wat aan ons sorg toevertrou is,
sodat ons weet dat Jesus by ons is.
Help ons om bewus te wees van die band tussen die hemel en die aarde
en maak dit tasbaar vir ander,
en hoor ons gebed om Jesus se wil.

Amen.

www.petrus.protestantsekerk.nl/artikel/gebed-hemelvaart-u-woont-daarboven/

Vertaal deur Sanet du Plessis